

**26. marts 2015**

**Pisortat inissiaattaannik aqutsinermi akissajaatit ikililernerqarsinnaanerannik periarfissat pillugit misissuisoqarnissaanik apeqquteqaat aallaavigalugu oqallinnissamik siunnersuut.**  
(Inatsisartunut ilaasortaq Hans Enoksen, Partii Naleraq)

Siullertut siunnersuuteqartoq Hans Enoksen Partii Naleqqameersoq qutsaviginiarparput apeqquteqaat aallaavigalugu oqallinnissamik siunnersuutaanut soqutigintumut. Siumumiit soqutigilluinnarparput ullumikkut innuttaasut sumiiffippassuarni ineqarniarnermi atugarisaat pillugit oqallinnissamut peqataassalluta.

Siumup pingaartutut isigaa innuttaasoq kinaluunniit akissaqartitsiffigisaminik ineqarnissamut pisinnaatitaaffeqassasoq. Kialaamut iserfissaqarluni angerlarsimaffeqarneq nunami maani pingaaqaaq, taamaattumik ineqarneq pillugu iluarsartuusseqqinnisaq allaqqunneqarsinnaanngitsutut Siumumiit isumaqarfigaarput.

Pingaarteqarpoq ullumikkut killiffik nalilersussallugu, taamatuttaaq ineqarniarnerup kiisalu ininut akigitinneqartut pillugit oqallittariaqalernerit minnerunngitsumillu iliuuseqarnissat pisariaqalivimmata. Ukiunimi makkunani tusartualersimavagut akitigut qaffaajuarnit taamatuttaaq annerna-raluaqisumik iniminniit anisitaasartut aamma tusarsaajualersimammata.

Sukumiisumik misissuisoqartariaqarneranik siunnersuuteqartumiit kissateqarneq taperserlugu ilalerumavarput.

Tamatsinnut soqutiginassaaq ersarissumik paasissallugu sunarpiaruna pissutigalugu ineqarnermut tunngasut taamak killiffeqalersimasut.

Kiisalu akitigut tapiissutigineqartartut eqqarsaatigalugit akinik apparsaataasinnaasumik ujartuisariaqarneq pisariaqalersimammata Siumumiit oqaatigerusupparput. Ullumikkummi killiffik eqqarsaatigalugu ineqarnermut akigitinneqartartut qaffasippallaamik inissisimanerat nassuerutigisariaqarat-sigu kukkuneruallaarunangilaq, taamaammata ajornartorsiutaasut suunerinik erseqqaarissumik paasisaqarnissarput pisariaqalivippoq.

Annertuumillu unammilligassanngorsimavoq ineqarnermut akit qaffasippallaarujussuarnerisa kingunerisaanik aningaasaqassutsimut kiisalu inuuniarnikkut atugarisat pitsaanngitsumik sunnuttarneri takujalersimagatsigik, soorlu akiligassanut allanut angummanniarnerit, meeqqanut pisariaqartitat amikkisaarfigineqalernerit kiisalu ulluinnarni inuuniarnermi pisariallit eqqarsaatigalugit artornartumik inissittarnerit pilersimammata.

Pisortat inissiaataannik attartortut ilaat angummanniapiloorlutik ineqaanarnissamik ilungersuuteqarnerat Siumumiit arajutsisimangilagut, taakuusarpullu sulisartut isertitakitsut, akunnattumik isertitallit, ilinniartut kiisalu utoqqaat. Taamaattumik ineqarnermut tapiissutit ullumikkut atuuttut eqqarsaatigalugit nutartertariaqalernerit kiisalu nalimmassartariaqalernerit avaqqunneqarsinnaanngitsutut Siumumiit isumaqarfigaagut.

Oqallisissiap qulequtserneqarsimanera eqqarsaatigalugu pisortat inissiaattaannik aqutsinermi akissaajaatit ikililerneqarnissaannik periarfissat misissorneqassasut oqariartuutigineqarpoq, tassungalu tunngatillugu Siumumiit aningaasartuutaasartut qulaajarneqarnissaat nalilersuiffigineqarnissaallu pisariaqartutut isigaarput. Taamaaliornikkut sordiaat akissaajaatit isigineqarsinnaasut qulaajarneqarniassammata.

Naalackersuisooqatigiinnermi isumaqatigiisummi ineqarneq pillugu iluarsartuuseqqinnissat ilaatinneqarput, taamaattumik Siumumiit isumalluarpugut ilaatigut ineqarniarnikkut allaffissor-nikkut sullissinerit eqaannerusumik sukkanerusumillu aaqqissuunneqarnissaat pisussaassammata. Minnerunngitsumik tamatumani aamma eqqarsaatigaagut soorlu nunaqarfinni isorliunerusunilu innuttaasunik ineqarniarnikkut sullissinerit ullumikkut kipiluttunartumik eqarpallaamillu ingerlanneqartut iluarsivigineqartariaqarmata.

Siumumiit taamatut oqaaseqarluta apeqquteqaat aallaavigalugu oqallinnissamik siunnersuut qujasutigaarput, matumanilu taakkartukkagut ilanngullugit isumaliutigineqarnissaat kaammattuutigaarput.

Anders Olsen  
Siumut